

# Gui'ch go'n nierdi wfua' Juan

**1** ¡Diux, Dios gunley tu!

<sup>1</sup> Rlati'n gakan tu, men rzeti'n lo tu, niuli men hor wa' yrati' go'n niu'. Men nak Di'dx Mben, men nak Guilmben.

Xalno wo'n yra go'n wne' men, wanpa' no go'n wla men. Wanlopa' no men, haxta wze'n no nia men. Men kua nagon nak men rze't no lo tu.

<sup>2</sup> Wdxin dxe, wak men miech wdxid' men. Xal no wanpa' no men. No nahor, la' no niurne' lo miech gakan miech chu nak men. Golbin gan tu, men nak men rne'dx guilmben, men rne'dx tib guilmben go'n ydxindi dxe ylux. Lo Xuz ba Dios wru' men, wdxid'x men wak men miech, wu'nbe'y no men.

<sup>3</sup> Chud rne'di piri' cuent, xti'dx men niu' no rne' no. Wanpa' no men, wonpa' no yra go'n wne' men. No la'w rne' no lo tu, dxen titi' gak ba yra ba, dxen skua titi' gak ba kuig ba yben-no ba Dios, men nak Xuz ba, ni Xpë'd men Jesús.

<sup>4</sup> Yra go'n rzeti'n ne, rka'n lo gui'ch go'n rxa'li'n lo tu, la'w rzeti'n, dxen hor gon tuw, guien tu ybig tu titi' gak ba yra ba, nlepa' chuguilrxil listio' ba.

<sup>5</sup> Golgaknan gan tu, sre nak go'n won no wunse'd Jesús miech, no la'w nak go'n rne' no lo tu na: Tib men mbi nak Dios, chudi dxe yla men go'n nak dol. Nak men zik tib bini, guiendi guilnkew low.

<sup>6</sup> Go'n kien nak, men rne' runbe'y men Dios, mben-no men Dios, per bi niu' men mben men lo guilnkew, rkade men nan nga. Non di'dxli nan nga rne' men runbe'y men Dios, mbendi men zik nak di'dx nle. <sup>7</sup> Porque men zanal mben lo guilbini, niu' men xniaz mben men zik nak Dios, titi' nak men nakno men yra men nakyra men. No ni nakdow go'n kuati', sinque rsa'nmbi Dios men lo yrati' xtol men, porque rneladx por go'n kuapa' wxi xchen Jesús, hor wet men.

<sup>8</sup> Yrati' men rne', ni tib dol rapdi men, go'n nledi nan nga rne' men, laka menga'k rkade men. Nga rlu' nledi runbe'y men di'dx nle. <sup>9</sup> Sa'ndi men rien niu' xtol, chil yxobdol men yra xtol men lo Dios, yupli zu'n Dios men perdón, la' men guia'n mbi lo yrati' xtol men, zik wze't-li Diosu ylo. Porque go'n rze't Dios yla, yupli rla menu, no rla menu zik niu' gaku.

<sup>10</sup> Wze't-li Dios, yrati' ba nak ba miech niu' xtol ba. Nga nak men rne', ni lal no zardi yla men go'n guntal xtol men, rruka tib men rkade rzo'b men Dios nan nga.

**2**<sup>1</sup> Meᵗᵗa, nlepa' rkadi'n tu, yra go'n rka'n ne rxa'li'n lo tu, la'w rka'n dxen guien tu te'd-di tu di'dx yla tu go'n guntal xtol tu. Men zuli yla tib dol, golbi'nsiadx zak gu'n Dios tu perdón, porque Jesús gon, men rka'lo ba, men rla niebti' go'n buen, men nak men tigak zu lo Xuz ba Dios, rnab men yjalistio' Dios ba. <sup>2</sup> Golbisiadx gan tu, Jesús wdéd xguilmben wet men, wak men tib gon lo Dios, skua wax yrati'pa' xtol ba. Ni nakdow non xtolti' ba, sinque nga wguix men xtol yrati' miech men nre lo guixyu.

<sup>3</sup> Golbin gan tu, niupa' yben ba go'n rxo'dx Dios. Chil ron ba xti'dx men, mben ba zik rxo'dx men, nga rlu nlepa' runbe'y ba men.

<sup>4</sup> Men rne': "Nasi' rumbe'yi'n Dios", per naku rladi men go'n rxo'dx Dios, rkade men nan nga. Nledi rien men xan nak xti'dx Dios. <sup>5</sup> Sa'ndi men ron xti'dx Dios, ranka men dxich go'n rxo'dx Dios, nga rlu' men nle rkan men Dios.

Skua nagon rlu' nle rumbe'ypa' ba Dios, nlepa' mben-no ba men. <sup>6</sup> Go'n kien nak, men rne' runbe'y men Dios, mben-no men Dios, niupa' yben men zik wben Jesús hor wdxid men lo guixyu.

<sup>7</sup> Compañer men rneladx Jesús, rnabi'n lo tu tib tib tu golblu' rkan tu men nakyra tu.

Nakdow tib di'dx nkuib. Nakdow gon. Go'n re nak go'n wfadiag tu, haxta hor wslo tu wneladx tu Jesús. La'w nak go'n tigak rkadiag tu. <sup>8</sup> Per, hor rui' ba

xan nak go'n wla Jesús, wlu men xan nak guilrka'n, ni xan rkanga' tu men nakyra tu, zak yne' ba tib di'dx nkuib naku. La' guilrkan kien niurlu', porque cho'wga' cho'wga' la' guilnkew niurbiche, la' merpa' bini karzunili.

<sup>9</sup> Men rne'ga': "Rapi'n guilbini, rienpa'n xniaz mbeni'n niaz lo Dios", per chil rla'no men men nakyra men, rkade men nanga. Bi' lo guilnkew nanga mben men.

<sup>10</sup> Golbien gan tu, men rkan men nakyra, men kien nak men nlepa' rap guilbini. Niudi pi go'n yja'ki guntal men xtol men. <sup>11</sup> La' men rla' rui' yra men nakyra, lo guilnkew na nga mben men. Nga niu' men, nikli riendi pa niaz sia men, porque pit rui'di men.

<sup>12</sup> Mexa, go'n rka'n ne la'n rne yra go'n re lo tu nak tu men wu'nli Dios perdón xtol, por yrati' go'n wded Jesús wguix men xtol tu.

<sup>13</sup> Tu nak tu men ndxich zu lo xti'dx Dios, la'n rne yra go'n re lo tu nak tu men zali dxe runbe'y Jesús, men nak men niuli desde hor wa' guixyu.

Tu nak tu men nak men miu, la'n rne yra go'n re lo tu nak tu men nadis wslo rneladx Jesús, ndxi'ch zu tu, ydib listio' tu rla tu go'n nak xti'dx Dios, porque midir mendxab yji'l men tu.

Mexa, golgaknan, go'n karka'n ne, la'n karnew lo tu nak tu men wu'nbe'yli Dios, men nak Xuz ba.

<sup>14</sup>La'n karne lo tu, yrati' tu nak tu men zali dxe ngab lo Dios ndxi'ch zu tu, porque rneladx tu Jesús, men niu' haxta hor wya'n guixyu

La'n rne lo tu, yrati' tu nak tu men nadis wslo wneladx Jesús,

ndxich zu tu, kaniu xti'dx Dios guik tu, riu tu mben tu zik naku, nak tu men midir mendxab yji'l.

<sup>15</sup>Yrati' tu, la'n rne lo tu: Ysobyadxdi tu, chankadi tu dxich yra go'n rak lo guixyu re, yla'ndi tu yra go'n rla'n yra miech men rkalodi Dios.

Men rluxdi rkan yra go'n rak lo guixyu re nledi rla'n men Dios. <sup>16</sup>Porque yrati' go'n niuxchi'ndi go'n rkan yra miech lo guixyu, —zik nak yra go'n nxu'dx go'n rdxiladx xcuerp men, zik nak hor rzobliadx men gap men go'n rla'nti' men, zik nak guilguia guik, hor rdxin men go'n rap men—, ¡nakdow go'n rla'n Dios yla miech! Dxich yra go'n kua ranka yra miech runbe'ydi Dios. <sup>17</sup>No stibu, nakdi yra go'n kua go'n ydibdi. Yra miech nxudx, ni yra go'n nxu'dx go'n skua rdxiladx men, slux men yra menuw; sa'ndi men mben zik rxo'dx Dios, ¡la' men wgali tib guilmben go'n ydxindi dxe ylux!

<sup>18</sup>Mexa, nxili rak falt ydxin dxe la' guixyu re ylux. Wonli tu gon, gal dxe kien, yupli sruka tib men chu encontr Jesús, nak men men wzu Dios rnabe'y. Nan ba la' dxe kien ze'dgaxli, porque xan nak le'n dxe re, pa lak-li men niu' xiencontr men karruka.

<sup>19</sup>Nle ladga'k ba wru' men, per go'n nak go'n nle, wfalodi men Jesús zik rka'lo ba men. La' men kien wbiche lo ba, nga rlu nledi nakyra men ba. Chil naku nlepa' nakyra men ba, nru'xchudi men ba.

<sup>20</sup>Sa'ndi tu, Jesús Men nak men Nro'b men runbe'y ba, xalmen wxa'l Espíritu Santo nakno tu, nga nak yrati' tu men niubinili nak tu, nanpa' tu di'dx-nle.

<sup>21</sup>Gui'ch go'n rxa'li'n lo tu ne, nakdow por nandi tu xti'dx men, porque nanpa'n nan tuw. La'w si'd lo tu, porque nak tu men rumbe'yli xti'dx men, no xniaz xniaz nan tu xan nak yra wse'd go'n ze'dno yra men niu' rkade, wse'd go'n nakdir xti'dx Dios.

<sup>22</sup>Yra men rne wa nledi Jesús nak Men wzu Dios ynabe'y lo guixyu, ¡men kua nagon nak men rkade! Men skua rla, la' men mal men niu' encontr Jesús na nga; ni noli Xuz men nan nga rla' men rui' men.

<sup>23</sup>Tib men nedi yneladx Jesús nak xpë'd Dios, nga rlu nledi mben-nodi men Dios; sandi men rneladx nle xpë'd Dios nak Jesús, nga rlu' nle mben-no men kien Xuz men.

<sup>24</sup>Nga nak la'n rso' di'dx lo tu gon: Golbien, tiga'k ndxi'ch golsu lo yra go'n wse'd tu hor ylopa' wslo wneladx tu Jesús, gon kua golchanka dxich. Chil tiga'k chanka tu dxich go'n kua, ydxindi dxe ybiche tu lo Jesús, ybichega' tu lo Xuz men Dios. <sup>25</sup>No stibu, yupli' xga tu tib guilmben go'n ydxindi dxe ylux,

guilmben go'n wze'tli Jesús yte'd men lo yrati' men mben-no men.

<sup>26</sup> Go'n wlux wzeti'n ne, la'w rzeti'n lo tu dxen nses su tu lo yra men skua niu' rla'n yjade tu. <sup>27</sup> Xan nak tu gon, la' tu wfaniali Espíritu Santo, men wxa'l Jesús lo tu, men mben-no tu, rki'ndi tu stib men skua gui'd gunse'd tu. Espíritu Santo rla guien tu yrati' go'n niu' gakanan tu, no mensi gon, di'dxnle nak go'n runse'd men, led nodi men rkade. Nga nak, tiga'k golchanka dxich yra go'n karunse'd men tu, yup ybichedi tu lo Jesús.

<sup>28</sup> Mex, nanli tu skua ndxi'nch golsu, ybichedi tu lo Jesús, dxen titi' gak listio' tu la' tu ybig lo men gal dxe la' men gui'd. Porque men zu tibko' lo men, gal dxe kien, hor la' men gui'd, mban gak men; porque guilntu guia'n men lo Jesús. <sup>29</sup> Nanli tu gon, niebti' go'n buen, go'n xniaz rla Jesús, skuaka na gon hor ywi' tu skua mben tib men nakyra tu, nga guien tu gon nle xpë'd Dios nak men.

**3**<sup>1</sup> Golbui' gan tu, ¡pa loti' rkan Dios ba men nak Xuz ba! Nlepa' rkan-ro men ba, nga nak rne' men xpë'd men nak ba. ¡No nlega'w xpë'dli men nak ba! Yrari' miech, rneladxdi menu, porque rumbe'ydi men chu nak men.

<sup>2</sup> Compañer men rneladx Jesús, nak tu men rkadi'n, nle gon xpë'd Dios nak ba, per nandi ba nahor xanpa' gak ba hor chalo ydxa' ba. Go'n nanpa' ba, hor la' Jesús gui'd stib, la' ba gak zik nak men, porque hor kiensi', la' ba ganlo zik nakpa' men. <sup>3</sup>No yrati' men nanpa' yup zak men zik nakpa' Jesús, riu men zik za za dxe rsa'n men go'n runtal xtol men, rben men zik rla'n Dios, porque xan nak Jesús, randxedi men dol.

<sup>4</sup>Men tiga'k niu' runtal xtol, lo Dios nan nga rakndxe'b men, xley men nan nga rgui'ch men, porque dol nan nga rla miech hor lo xguilndxe'b men, rladi men go'n rxo'dx Dios. <sup>5</sup>Per, nanli tu gon, yupli la' Jesús wdxid lo guixyu, wdxidgo' men miech len nia dol. Mensi' gon ni tib dol rapdi men. <sup>6</sup>Nga nak, men nlepa' rbig rben-no men Jesús, rudi men lo yra go'n runtal xtol men. Men tiga'k niu' lo go'n runtal xtol, nga rlu' zardi guien men chu nak Jesús, sardi gunbe'y men men.

<sup>7</sup>Mex, nses golsu, dxen chud yjadedi tu. Men mben zik rla'n Dios, nga rlu nle lo Dios ngab men, men buen nak men niaz lo Dios, zik nakga'k Jesús. <sup>8</sup>Sa'ndi men tiga'k niu' runtal xtol, xniaz mendxab ngab men,



mendxab rnabe'y lo men; porque skua nak mendxab. Haxta mas ylo, hor penti rak wya'n guixyu, tiga'k niu' mendxab karla men go'n nak dol. No por go'n kuapa' nak wdxid' Xpë'd Dios lo guixyu, wdxid'go' men miech len nia mendxab, wtixche men guilrnabe'y go'n rap mendxab dxen gakdir yla medxab go'n rla.

<sup>9</sup> Men nakli xpë'd Dios, rudir men lo yra go'n guntal xtol men, porque xaldios wslo wde'd stib guilmben lo men, guimben kuali rap men. Niudir chu men lo yra go'n guntal xtol men, porque Diosli nak Xuz men.

<sup>10</sup> Nga nak, nio'pa' chu nak xpë'd Dios, gan chuga' nak xpë'd mendxab.

Men rladi go'n buen niaz lo Dios, men rkandi men nakyra men, ni xpë'd-di Dios nak men. <sup>11</sup> Porque haxta hor wslo wfa'diag tu xti'dx Dios, haxta hor kien won tu, tib tib ba yup niupa' yjan ba yra men nakyra ba. <sup>12</sup> Niudi gak ba zik wak Caín. Caín wak tib men wgab xniaz mendxab, wla' Caín wan bech, haxta wguet men bech men. No, ¿pi nak na' gan skua wla Caín? La' Caín wla go'n kua, porque xniaz mben bech men niaz lo Dios, la' men na' niebti' lo guilmal wu men. <sup>13</sup> Go'n kien nak gon, compañer men rneladx Jesús, hor ywi' tu la' yrari' miech rla' rui' tu, yupli ynabdi'dxdi tu gan pi nak skua rla men tu.

<sup>14</sup> Xan nak ba, nanpa' ba niudir ba niaz go'n rxa'li miech led ylux men. La' ba wruli niaz kien, la' ba rapli stib guilmben; porque rak rkan ba yra men

nakyra ba nahor. Men rkandi yra men nakyra men, niaz go'n ylux men na nga za. <sup>15</sup> Porque yra men rla' rui' sa'miech, ruka rguiet men na nga; no nanli tu gon, men rguiet sa'miech, rapdi men guilmben go'n ydxindi dxe ylux.

<sup>16</sup> Nanli ba nahor xan yla'npa' ba men nakyra ba, porque nan ba xan wlu' Jesús xan rkan men ba, wgo'guik men xguilmben men wet men por xcuent ba. Skuapa' na gon niu' yla ba yjan ba yra men nakyra ba, chil naku chachinu haxta xguilmben ba te'd ba par dxen pit gakdi men. <sup>17</sup> Per zik nak nahor, chil rap ba yrati' go'n rki'n ba, haxta raku sobr lo ba, niupa' gu'n ba xiyudar men hor rui' ba rdxaldi ni guiendi pi yji'n men. Chil rui'pa' ba xan rak men, rgadi go'n yji'n men, no rkalistio'di ba men, ¿xanxi' dxiguien rne' ba ydib listio' ba rkan ba Dios?

<sup>18</sup> Mexa, nga nak, niu' ylu' ba nle rkan ba men nakyra ba. Gakdow luxguil non di'dxli. <sup>19</sup> Chil skua yjan ba yra men nakyra ba, nga na gon ylu' nle lo Dios ngab ba, zanal ba xti'dx men. Hor kien, titi' nit gak ba hor ybig ba yne' ba lo men. <sup>20</sup> Titi' nit gak ba, nikxi' mas ze'd len guik ba niu' led rap ba falt, porque men mazri' nro'b nak Dios, chil pitow, nanpa' menu. Xniaz xniaz runbe'y men ba.

<sup>21</sup> Mex, chil listio' ba, xguilrien ba, nan ba karladi ba go'n mal, titi' nit rak ba rne ba lo Dios. <sup>22</sup> Go'n

ynabti' ba lo men, ska'nia baw, porque mben ba zik r̄xo'dx men, riu ba karla ba go'n rdxiladx men.

<sup>23</sup> Golbien gan tu, go'n r̄xo'dx men ba, niupa' ydib listio' ba yneladx ba pa loti' men nro'b nak Jesús, men nak Xpë'd men, no yjan ba men nakyra zik w̄xo'dxga'k Jesús ba <sup>24</sup> Men rla go'n r̄xo'dx Dios, men kien nak men mben-no Dios, no skuaka'ga' Dios mben-no men men kien. No nan ba gon, xan nak ba, mben-no Dios ba, porque mben-no ba Espíritu Santo, men wxa'l men nakno ba.

**4** <sup>1</sup> Compañer men rneladx Jesús, men yne' la men karne di'dx rse'b Espíritu Santo guik men, yneladxgaxdi tu xiwse'd men.

Golbui'gax gan chu nak men, xniaz xniaz golbui' gan ba nle Xti'dx Dios nak go'n rne' men; porque ndal men kanxo'n lo guixyu, rkade men rne' men xti'dx Dios karted men.

<sup>2</sup> Par gakanan tu chu nak men nle karte'd di'dx go'n rze'b xiEspíritu Dios guik men, ¡Golpkadiag! Men ywi' tu clar rne' rneladx men lo Dios wru' Jesús wak men miech wdxid men lo guixyu, men kien nak men nle karte'd xti'dx Dios, men kien nak men nakno xiEspíritu Dios. <sup>3</sup> Sa'ndi men ywi' tu rne' rneladxdi men nle skua wdxid Jesús, nledi xti'dx Dios karte'd men. La men kien nak men nakno xiespíritu men niu' encontr Jesús. Wonli tu gon, yupli la' yra men kien niu' gui'd, no nlega'w, xan nak nahor, la' men kanxo'nli lo guixyu.

<sup>4</sup> Mexa, xan nak tu gon, xniaz Dios ngab tu. Nlebdi yra men kua nkade men tu, porque, mazri' nro'b nak poder rap Espíritu Santo men mben-no tu, nikedi lo poder go'n rap mendxab, men rnabe'y lo yra men rumbe'ydi Dios. <sup>5</sup> Nakdi men men ngab lo Dios. Nga nak, yra wse'd go'n rdxiladx yra miech rneladxdi Dios, go'n kien rne' men; no skuaga', yra men rneladxdi Dios, men kien zanka dxich xiwse'd men. <sup>6</sup> Sa'ndi no, xniaz Dios niu' no. No skuaga', men

runbe'y Dios, men kien rkadiag go'n rne' no; la' yra men rumbe'ydi Dios, rkadiagdi menu. Sre na gon srulo gaknan ba chu nak men rne' xti'dx Dios, chuga' nak men karkade miech.

<sup>7</sup> Compañer men rneladx Jesús, tigak yjan ba yra men nakyra ba. Men nakli xpë'd Dios, men rumbe'yli men, rkan men men nakyra men; porque xalDios rakno ba rak rkan ba sa'miech ba. <sup>8</sup> Yra men rkandi sa'miech, nga rlu' rumbe'ydi men Dios, porque Dios nak men rlu' xan nak guilrkan. <sup>9</sup> Golbui' gan tu, mazxi' titi' xpë'd men per wxa'l men më'd kien lo guixyu wdxiditix men xtol ba, dxen yga ba tib guilmben ndxon go'n ydxindi dxe ylux. Nga rlu men lo ba pa loti' rkan men miech. <sup>10</sup> Srepa' nagon nak guilrkan. Nakdow zik rla ba hor rne' ba rkan ba Dios. Sinque, la' guilrkan nga rlu' Dios, hor wxa'l men Xpë'd men, wet men wak men tib gon, wguix men yrati' xtol ba, la' ba wrula' lo castig go'n rial ba.

<sup>11</sup> Compañer, chil haxta skua rkan Dios ba, skuakaga' tib tib ba niu' yjan ba men nak yra ba.

<sup>12</sup> Golbie gan tu, chud zardi ywi' Dios zik nakpa' men, per hor rkan ba men nakyra ba, nga rlu' mben-no Dios ba. No yupli skuapa' na gon rla'n Dios yben ba, porque hor wlu' men lo ba pa loti' rkan men ba, rla'n men no ba skua yjan sa'miech ba.

<sup>13</sup> Zik nak no, nanpa' no mben-no no Dios no mben-no men no. Nan now, porque wxa'l men

xiEspíritu men nakno no. <sup>14</sup>Ni karne' no lo miech gan xan wanlopa' no wxa'l Dios Xpë'd men Jesús wguix̄xtol yrati' miech, wdxidgola' men ba lo castig go'n rial ba. <sup>15</sup>Nga nak, men rbo'ru rneladx men Xpë'd Dios nak Jesús, men kien nak men mben-no Dios, no skuakaga' Dios, mben-no men men. <sup>16</sup>No stibu, napa' ba pa loti' rkan Dios ba, ni sanal ba mben ba zik rial yben men rien rla'n Dios men.

Dios nak men rlu' xanpa' nak guilrkan. Yupli nia' men par yjan men miech. Nga nak nan ba, men rien rkan Dios men ni rkan men sa'miech men, nga rlu' mben-no men Dios, skuaka'ga' Dios mben-no Dios men. <sup>17</sup>Gon kien nak, hor rien ba rkan Dios ba, niupa' yjan ba sa'miech ba, no skuapa' rla'n Dios yben ba. Gal dxe la' men yla xguiljustis men, chut ydxe bdi, titi' gak listio' ba ybig ba lo men; porque wben ba lo guixyu re zik wben Jesús. <sup>18</sup>Hor nan ba rkan Dios ba, niudi pi nak ydxe b ba men gal dxe yla men guiljustis. Porque, hor nanli ba pa loti' rkan men ba, rslo ba rkan ba men ni rkan ba sa'miech ba zik rla'npa' men, ¿pi nak gan ydxe b ba men? Men rdxeb rui' Dios, nga rlu' rdxeb men yte'd Dios men castig. No stibu, nga rlu' zardi guien men xan yjan men Dios ni xan yjan men sa'miech men, zik rla'npa' Dios.

<sup>19</sup>La' ba rkan Dios nahor, la' ba rakli rkan sa'miech ba, porque nierdi Dios wfan ba. <sup>20</sup>Men rne': “Nasi rkanpa' Dios”, per rla' men rui' men men nakyra men,

nledi nak xti'dx men, rkade men nan nga. Porque, chil rkandi men nakyra men, men rui'pa' men, ¿ba lal Dios dxiguien ynleadx ba nle rkan men, nak Dios men rui'di men? <sup>21</sup> Porque xalJesús sre rxo'dx, sre nak sti'dx men, wne' men: Men nlepa' rkan Dios, skuakaga' niupa' yjan men men nakyra men.

**5**<sup>1</sup> Yrati' men nakli xpë'd Dios, men kien nak men rneladx Jesús nak Men nakli di'dx wzu Dios ynabe'y.

Men rkan tib men nak Pa, rkan men yra xpë'd men kien. <sup>2</sup> Nga nak, nahor rkan ba yra men nak xpë'd Dios, porque rkan ba Dios, rla ba go'n rxo'dx men. <sup>3</sup> Hor rla ba go'n rxo'dx Dios ba yla ba, nga rlu' rkan ba men. No yra go'n rxo'dx Dios, nakdow go'n yrulodi yla ba. <sup>4</sup> Porque yrati' men nakli xpë'd Dios, masxi nle ndal nak yra go'n rzu men tibko' lo Dios, per rundi go'n kua gan lo men, porque la guik men niu' yla men go'n rxo'dx Dios. Gak-nxendi men lo yra go'n kien, porque ndxi'ch zu men rneladx men go'n won men hor waknan men chu nak Jesús. <sup>5</sup> ¿Chu gan ru'n gan chil ni nakdow men? ¡Menti' mi gu'n gan lo yra go'n nxu'dx go'n rak lo guixyu re! Porque, mensi nak men rneladx Xpë'd Dios nak Jesús.

<sup>6</sup> Xniaz xniaz nan tu gon chu nak Jesús. La' men nga wdxid lo guixyu re, wrobnis men ni wxi xchen men wet men, Xpë'd Dios nak men. Men nan nga wrobnis, no menka nan nga wxi xchen wet. Haxta Espíritu Santo rne' nle skuaw, ni yrati' go'n rne' Espíritu Santo, di'dx-nlew. <sup>7</sup> Chon mod rlu lo ba gon nle Xpë'd Dios nak Jesús. <sup>8</sup> Tibu nak, por go'n karlu' Espíritu Santo. Stibu nak, por go'n rlu' hor wrobnis men, no stibu, por go'n rlu' hor wet men. Tib tibu, nga rlu'w gon nle Xpë'd Dios nak men.



<sup>9</sup>Nanli tu gon, go'n rne' tib miech wanlo men, nsesti' rneladx baw, ¿ba la'l go'n rne' Dios dxiguien yneladxdi ba? Go'n rne' Dios, mazri' naku, nakdow xan nak xti'dx miech. XalDios karne' lo ba chu nak Xpë'd men Jesús. <sup>10</sup>Men rneladx lo Dios wru' Jesús, ydib guiklistio' men nanpa' men di'dx-nle nak go'n skua wlu' Espíritu Santo. Men nedi yneladx go'n rne' Dios, hor rzet men Xpë'd men Jesús, ruka rzo'b men Dios zik tib men rka'de na nga.

<sup>11</sup>No sre nak go'n kane' Dios lo ba, rne' men la men wnedxli tib guilmben go'n ydxindi dxe ylux lo ba. La guilmben kien rguied Xpë'd men Jesús. <sup>12</sup>Go'n kien nak, men mebn-no Jesús, la' men wgali tib guilmben go'n ydxindi dxe ylux; la' men ybigdi yben-no Jesús, ygadi menu.

<sup>13</sup>Tu nak tu men rien Xpë'd Dios nak Jesús, rka'lo tu men, la'n karzet yra go'n re lo tu dxen xniaz xniaz gaknan tu la' tu wgali guilmben kien, guilben go'n ydxindir dxe ylux.

<sup>14</sup>Go'n kien nak, niudi pi nak ydxeb ba hor ynab ba pi cos lo men. Porque nanpa' ba yupli xne'dx men go'n ynab ba lo men, hor go'n rdxiladx men rnab ba lo men <sup>15</sup>Nga nak, hor ynab ba pi cos lo men, niudi pi nak gakchup guik ba, porque yupli sne'dx men go'n rnab ba lo men.

<sup>16</sup>Hor rui' tu, o raknan ga' tu chu tib men nakyra tu wu'ntal xtol, rnabi'n lo tu golbnab lo Dios gakno

men ysa'n menu, dxen zak yben men lo Dios stib. Niu' dol go'n gakdi gu'n Dios perdón, men rlaw, la' men wluxli na nga. Men rui' tu karla dol kien, rnedin lo tu golbnabpa' gakno Dios men ybig men lo Dios. <sup>17</sup>Nle yra guilmal, dol nanku, per niu' dol go'n gakdi gu'n Dios perdón, men rlaw, la' men wluxli nan nga.

<sup>18</sup>Nan ba gon, men nakli xpë'd Dios rudir men lo yra go'n runtal xtol men; porque Jesús Men nak Xpë'd Dios, men kua rkanap men, ylebdi mendxab yji'l men.

<sup>19</sup>Nan ba, zik nak ba, xpë'd Dios nak ba, lo men ngab ba; la' yrari' miech, len nia mendxab niu' men, go'n rxo'dx mendxab go'n kien zanka men dxich.

<sup>20</sup>Skuakaga' nan ba, la' Xpë'd Dios wdxid, wdxid wguixbini men xguilrien ba la' ba rak runbe'y men nakpa' Dios. No nahor, mben-no ba men nakpa' Dios, porque runbe'y ba Xpë'd men Jesús, mben-no ba Jesús. Mensi' nak merpa' Dios men mben, no men nak men rguied guilmben ndxon go'n ydxindi dxe ylux.

<sup>21</sup>Mexa, Dios nak men golbnalo; Golbiche lo yra go'n rzo'b miech nak Dios.